

ODLUKA O UTVRĐIVANJU SPECIFIČNE I MINIMALNE AKCIZE NA CIGARETE I IZNOS AKCIZE NA DUHAN ZA PUŠENJE ZA 2024. GODINU*

(“Službeni glasnik BiH”, broj 87/23)

Član 1.

Ovom odlukom utvrđuju se iznosi specifične i minimalne akcize na cigarete i iznos akcize na duhan za pušenje, koji se primjenjuju od 1. januara 2024. godine.

Član 2.

(1) Od 1. januara 2024. godine, na cigarete se plaća akciza, i to:

a) proporcionalna akciza, po stopi od 42% na osnovicu utvrđenu u skladu sa članom 15. stav (1) tačka b) Zakona o akcizama u Bosni i Hercegovini (“Službeni glasnik BiH”, br. 49/09, 49/14, 60/14, 91/17 i 50/22, u daljnjem tekstu: Zakon) i

b) specifična akciza u iznosu od 82,50 KM za 1.000 komada, odnosno 1,65 KM za pakovanje cigareta od 20 komada.

(2) Za pakovanja različita od pakovanja navedena u stavu (1) tačka b) ovog člana specifična akciza se plaća srazmjerno broju komada u pakovanju.

Član 3.

(1) U skladu sa članom 21b. stav (4) Zakona, prema evidenciji o izdatim akciznim markicama Uprave za indirektno oporezivanje, prosječno ponderisana maloprodajna cijena cigareta u periodu od 1. jula 2022. godine do 30. juna 2023. godine, iznosi 5,76 KM za pakovanje cigareta od 20 komada.

(2) Minimalna akciza na cigarete se izračunava u visini od 60% prosječne ponderisane maloprodajne cijene cigareta iz stava (1) ovog člana.

(3) Primjenjujući metodologiju iz stava (2) ovog člana utvrđuje se minimalna akciza u iznosu od 173,00 KM za 1.000 komada, odnosno 3,46 KM za pakovanje cigareta od 20 komada.

(4) Za pakovanja različita od pakovanja cigareta od 20 komada, minimalna akciza se plaća srazmjerno broju komada u pakovanju.

(5) Minimalna akciza utvrđena u stavu (3) ovog člana primjenjuje se od 1. januara 2024. godine.

(6) Ukoliko je ukupna akciza na cigarete koja je obračunata u skladu sa članom 2. stav (1) ove odluke manja od minimalne akcize iz stava (3) ovog člana, plaća se minimalna akciza iz stava (3) ovog člana.

Član 4.

(1) Akciza na duhan za pušenje utvrđuje se u visini od 80% minimalne akcize, utvrđene u članu 3. stav (3) ove odluke i iznosi 138,40 KM po kilogramu.

(2) Akciza na duhan za pušenje utvrđena u stavu (1) ovog člana primjenjuje se od 1. januara 2024. godine.

Član 5.

(1) Porezni obveznik i drugo lice koje se bavi prometom cigareta koje podliježu primjeni odredbe iz člana 3. stav (6) ove odluke (maloprodajna cijena za pakovanja cigareta od 20 komada iznosi 4,30 KM ili manje), dužno je popisati zalihe cigareta na dan 1. januar 2024. godine obilježene akciznim markicama izdatim od 1. januara 2010. godine do 31. decembra 2023. godine i popisne liste dostaviti nadležnom regionalnom centru Uprave za indirektno oporezivanje (u daljnjem tekstu: Uprava) do 7. januara 2024. godine.

(2) Porezni obveznik i drugo lice koje se bavi prometom cigareta za koje se povećava maloprodajna cijena na dan 1. januar 2024. godine, neovisno o visini maloprodajne cijene, dužno je popisati zalihe tih cigareta na dan 1. januar 2024. godine obilježene akciznim markicama izdatim od 1. januara 2010. godine do 31. decembra 2023. godine i popisne liste dostaviti nadležnom regionalnom centru Uprave do 7. januara 2024. godine.

(3) Porezni obveznik i drugo lice koje se bavi prometom duhana za pušenje dužno je popisati zalihe duhana za pušenje na dan 1. januar 2024. godine, obilježene akciznim markicama izdatim od 1. januara 2010. godine do 31. decembra 2023. godine i popisne liste dostaviti nadležnom regionalnom centru Uprave do 7. januara 2024. godine.

(4) Popisne liste iz stava (1) i (2) ovog člana treba da, pored naziva obveznika ili drugog lica koje se bavi

* Odluka je objavljena u “Službenom glasniku BiH”, broj 87/23 od 26. decembra 2023. godine, stupila je na snagu 21. decembra 2023. godine, a primjenjuje se od 1. januara 2024. godine. Odluka je donijeta na osnovu člana 14. Zakona o sistemu indirektnog oporezivanja u Bosni i Hercegovini i člana 21a. stav (2), 21b. stav (5) i 21d. stav (2) Zakona o akcizama u Bosni i Hercegovini.

prometom cigareta i ID broja, sadrže sve elemente utvrđene članom 67. stav (1) tačka a) Pravilnika o primjeni Zakona o akcizama u Bosni i Hercegovini ("Službeni glasnik BiH", br. 50/09, 80/11, 48/12, 74/14, 85/17, 4/18, 3/21, 62/21 i 85/22, u daljnjem tekstu: Pravilnik).

(5) Popisne liste iz stava (3) ovog člana treba da, pored naziva obveznika ili drugog lica koje se bavi prometom duhana za pušenje i ID broja, sadrže sve elemente utvrđene članom 67. stav (1) tačka c) Pravilnika.

(6) Odredbe stavova (1), (2) i (3) ovog člana se ne primjenjuju na zalihe cigareta i/ili duhana za pušenje proizvedenih u Bosni i Hercegovini, koji nisu stavljeni u promet i nalaze se 31. decembra 2023. godine na zalihi kod obveznika akcize na domaći duhan i duhanske prerađevine.

Član 6.

(1) Porezni obveznik i drugo lice koje se bavi prometom duhanskih prerađevina dužno je na zatečene zalihe cigareta i duhana za pušenje utvrđene u popisnim listama iz člana 5. stav (1), (2) i (3) ove odluke obračunati akcizu shodno članu 2, 3. i 4. ove odluke, te do 17. januara 2024. godine uplatiti razliku između obračunate i već uplaćene akcize na Jedinstveni račun.

(2) Duhanske prerađevine za koje je plaćena razlika akcize shodno stavu (1) ovog člana, prodavat će se po novim maloprodajnim cijenama, koje moraju biti istaknute na vidnom mjestu maloprodajnog objekta.

Član 7.

(1) Ova odluka stupa na snagu danom donošenja i objaviće se u "Službenom glasniku BiH", a primjenjuje se od 1. januara 2024. godine.

(2) Danom početka primjene ove odluke, prestaje da važi Odluka o utvrđivanju posebne i minimalne akcize na cigarete i iznos akcize na duhan za pušenje za 2023. godinu ("Službeni glasnik BiH", broj 74/22).